



## *I schängg Dir mis Härz!*

Losch ämol di Radio a  
Isch jedesmol s'glych Liedli dra  
Dr Puls goht sofort Himmelwärts  
Ghörsch d'Rocker singe vo däm Härz  
wo sie dä Liebschte wei verschängge  
do chunnsch nüm druss mit nochedängge  
Vo wo sie die - vo welem Ort,  
vo Züri Wescht oder Bümplitz Nord?

Das schpielt kei Rolle, denn mir wüsse  
statt Härz und Liebi dänggsch a s'Küsse  
In Wahrheit git das alles Schmärze  
denn sälte schängge d'Lüt eim d'Härze  
Sowieso bechunnsch dy schöne Schmutz  
hüt numme mit m'grosse Schtutz!

Dr Hans goht is Romantica  
macht dört die schöne Fraue a  
und suecht mit Auge voller Luscht  
ä tolli rundi Fraue Bruscht  
Was macht dr Hans ächt jetzt äso  
Wenn'r nüm cha ane goh  
nachdäm das Huus isch abebrennt  
und alli blutt si uuse grennt?  
Mir hoffe numme dass dr Nobby  
und euse liebschte Diener Robby  
a dr Fasnacht kei Ersatz die biete  
denn Naare wei kei Puff zum Mietel!  
(Ae Tip a Hans, sett är's nit wüsse:  
z'Aesch hetts o ä Club zum Küsse)

Z'Himmelried goht dr Fritz  
i'd Waldegg mit grosser Hitz  
Als stiere Bursch mit volle Täsche  
Isch är nüm die grossi Fläsche;  
O z'Lieschbrg gsehsch für hundert Stei  
im Bahnhof meh als blutti Bei  
Dört het's scho villy iinegloggt  
und noohär het'se s'Gwüsse ploggt.  
Denn dört het scho ä Mängge  
gar nüm richtig chönne dängge  
Isch's ächt wäge däm Lokal  
dass s'nit klappt het mit dr Wahl?  
dass s'Gricht im Gmeinrot het befohle  
die Wahl, die muess me wiederhole?

Z'Laufe fehlt ä Sex-Lokal  
wo ablänggt vo dr Gmeinrootswahl  
mir würde süscht, chasch sicher sy  
i 10 Joor no am wähle sy.  
(d'Laufner sy bim rammle vor  
denn do wird g'rammlet sit 700 Jahr!)

Wär hüt uf gschänggti Härzli wartet  
und ä Liebeswärbe startet  
bruucht Glück und nomeh Gäld.  
so isch's halt leider uf dr Wält  
Süscht aber die's dr alles gä  
chasch d'Gschänggli eifach an di näh:  
D'BaZ schänggt gäali Eiter-Schnitte  
ohni Rücksicht uf die Digge  
Lindt verschänggt kei Gantebei  
sondern gratis Schoggi-Ei  
Pariser chasch, wie jedes Jahr  
am Jugendfescht becho  
Dr Pfarrer git ä TV-Programm  
und drzue si Autogramm  
D'Camilla schänggt ä Tampon zum Bohre  
do gwagglet dr Charles mit syne Ohre  
Vom Schneider Elisabeth gits ä Bummeli  
si isch halt gar kei Dummerli  
Im Lämmli gits wieder Stangeli  
und ä Schwätzli mit m'Hanneli  
Vo Härze wird fascht alles gschänggt,  
für jede het's, so hei mir dänggt  
Doch do duet ein vom Kreisel schreie  
„Es wott mr s'Härz i'd Hose gheie!“  
Dört stoht dr Imark mit sim Chare  
und wett gärn umenanger fahre  
doch klar isch: wotsch dr Waage längge  
muess dr öpper Benzin verschängge!

Zum Schluss ä Wunsch a d'IG Laufe  
wenn d'Lüt ämol die zweni chaufe  
Das Lieschbrg dörf kei Vorbild wärde  
s'git sicher bessrs uf dr Erde;  
drum machet eus uf gar kei Fall muff:  
mir wei denn do kei IG-Puff!  
Denn wenn mir nämlich Glüschkli hei  
gits jetz scho alles was mir wei:  
für Mini-Höösli us eim Fade  
gömmer in Hedy's Corset-Lade!

**Bon für einen Drink**

In rauchiger Atmosphäre

einlösbar bis Aschermittwoch im Romantica

Wert: 0.15 Rp. inkl. MWST.